

鄉鎮志專輯

中國地方志集成

鄉鎮志專輯 ⑱

封面設計 范一辛

責任編輯

盧建幸
王海浩

中國地方志集成

鄉鎮志專輯 ⑱

出版 上海書店

(上海福州路四〇一號)

印刷 上海市印刷七廠

發行 新華書店

上海發行所

1992年7月第一版 1992年7月第1次印刷
ISBN 7-80569-642-X/K·80

沪新登字119号

棲水去北關五十里以一橋爲之鎖鑰夾岸築塘市
塵隱賑澀書聚響聲沸水面百貨充物工匠斤削之
具靡不具水僅三里亦一小聚落也俗稱塘棲以有
石塘南岸兼有廊也夫百步之內有芳草十室之邑
有忠信棲雖壤地褊小高賢棲託風雅聿興卓呂丁
吳諸大姓矯尾厲角崢嶸於勝國之季聲妓園林號
稱極盛數傳而後樾館之書竹里之著述皆已蕩爲
烟雲水山之墅景蔽之堂析而爲薪夷而爲菜圃寒
蛩怪鳥叫嘯於荒烟喬木之上下扁舟來往憑弔無
由緬遺事而悲涼續琴尊而聞寂感慨繫之矣然而

唐棲志略序

人往迹畱燕語叢談一二載筆之流猶能歛歛道往
也北郭何東甫氏因前志少加翦薙不以爲備邑乘
者之助徵文者獻過客以之津逮騷人於焉取材庶
乎其可也歲在庚寅十月朔秦亭老民杭世駿

唐棲仁邑一鎮耳抵郡不六十里歲甲申北遊舟過
其地愛其山水清曠衡宇相接若不類乎鄉陬者時
牽於行役思一登覽而不得今年假館靈圃高君齋
中益知其人文風俗之美因思輯爲一書如周處之
記風土宗懷之記歲時顧弁陋無聞未敢握筆一日
高君出棲乘類編見示乃近人周逸民以里中耆宿
張半菴棲里景物略曹菽園棲水文乘二書分類增
補而成之也余旣病其名書之義周曹兩家不如張
氏之善卽其分類繁冗駁雜筆亦散敝近俗意復厭
之夫張氏仿劉侗帝京景物略也余雖未見其書要
必有可觀者遊覽之餘因取類編點竄刪改存十之
一釐爲二卷曰唐棲志畧蓋志所見聞略而不備也
然是書卽張曹氏之書也得無屋下架屋之譏乎雖
然雕鏤組繡等耳而其爲龍鸞爲花草則不同也乾隆
己丑冬仲何琪書

唐棲志略序

凡例

一是書爲目凡六曰山水曰古蹟曰梵刹曰園圃

曰寓公曰風俗

一是書四界悉依類編如古蹟所載奉口戰場去鎮似遠茲亦從之

一山水志勝也勝無可選并無題詠如龜馬諸山近在境內因併及之遠如洛山落瓜堰此何以書以有平氏徐氏地以人傳也

一福王花園按咸淳臨安志在天水院橋北名北園卽今郡城天水橋也茲在棲鎮豈別一園耶

唐樓志略凡例

俟博覽者考正焉

一水南廟神宋史諸王妃及節義傳俱不載然里人廟祀已久仍入梵刹

一大明寺井及唐棲寺類編均所不載并見元白

湛淵靜語寺見南宋六十三家小集釋永頤詩

一棲里人物因詩存人不另立門若夫選舉及鄉

賢貞節邑志之責概置不錄

一所志寓公有扁舟經過無地主款接之雅無畱連信宿之歡曷以寓名曰渡號來蘇載在往牒今人何必不如古人然則卽不謂爲寓公而棲

里亦幸其一至矣

一棲鎮密邇會城風俗不殊因錄里人竹枝詞數章實之亦觀風采詩之義耳

一棲里物產類編所載郡邑相同惟蜜橘洵稱嘉產易地則香味頓殊踰淮不知又何若矣觀沈金兩家竹枝詞爲木奴寫照不是過也

一類編所載諸家題咏妍媸並登今稍爲去取間有增入見於他書也

一鎮名按余友宋孝廉茗香塘西考有塘西唐栖棠邨唐西等名孝廉其里人也博雅好古所引

唐樓志略凡例

二

諸書明晰詳贍似可據依然鄙意地以人重仍作唐棲益重義士之所棲止也事見志寓公

唐樓志略稟卷上

何琪東甫輯

山水

半郭半村閒身偶寄一山一水散步時臨
雖無謝幼輿邱壑之姿不乏田游巖烟霞
之癖志山水

獨山

獨山在鎮南十八里一名金鰲山高二十丈周二里
脈連泉亭而聳出一方猶西湖之孤山也山北有巨
石狀若虎踞名大石岩下瞰橫溪冬月過此寒鴉古

唐樓志略卷上

木不勝荒寂前明陸氏隱此繞屋老梅數百本名萬

玉軒

夏與誠題萬玉軒詩暗香疎影句能傳暮景空林
色最妍瓊館夢回春似海琪園坐對日如年娟娟
霜月將三五粲粲冰花逾十千獨鶴歸來風動處
霓裳小隊舞羣仙

孫治過獨山陸氏詩曲水臨蓬徑橫山隱晚花壯
心思越石雄辯折田巴劍引浮雲盡杯深溪柳斜
著成新語在遲暮莫長嗟

趙山

超山高五十七丈周十五里諸山皆遠此獨臨峙鎮
南屏顏翠黛往往落於斜街委巷之中

呂需登超山絕頂詩春盡山行載酒瓢松聲攜我
上岩崑排空怒石崩雲出徑轉新亭接巖高一塢
濃烟藏虎豹半天清響落簫韶振衣獨立渾遺世
極目蒼茫江水遙

王廷璋登超山詩絕頂茆菴載酒過晴峯千尺鬱
嵯峩亂離吾輩登臨少淹忽浮生感慨多樹杪鐘
聲延杖履山腰閣道隱雲阿溪巒遮莫當時色剩
有春風到薜蘿

唐樓志略卷上

丁山

丁山在鎮南五里高止尋丈明丁方伯養浩之父樂
善公築讀書莊於此故名邑志謂高二十丈者小丁
山也下爲丁山湖

小丁山

小丁山高二十丈周二里由丁山湖支港折而東行
里許水又增闊迴汀曲渚之間小丁山在焉松竹蒙
密倒影寒浪其外村落多枇杷橙橘梅杏桃李之樹
每春花時遊丁山湖者至此更登巔眺望歌飲以爲
樂

龜山

龜山脈連超山高二十餘丈其北為馬山

馬山

馬山高四十丈長三里其西為白栗山

白栗山

白栗山高二十丈周里許直走溪河其麓為白栗橋

土山

土山高如丁山突起平坂中其山多土無石質鬆性潤宜種花凡栽蘭菊者多攜畚鍤取之

洛山

唐樓志略卷上

三

洛山距樓鎮十餘里地名橫里平顯字仲微號松雨居此顯與王紱交最密人每求紱畫非顯勿得也洪武中官廣西藤縣令謫戍滇南沐國公英延為西席著有松雨齋集

九月二十日懷故里詩歷盡風波兩鬢霜此生多幸亦多傷功名染指已自足富貴過人非所望萬頃水雲橫里北百年邱隴洛山陽奮飛不得心空繫殊覺今秋夜獨長

聞仲容弟居橫里詩舍弟謀生亦有涯橫溪移屋就魚鰕藕花官漾十二里桑蔭鄰村百數家颺字

帘風誇魯酒賣絲船雨避吳娃白頭兩地遙相憶
夢繞春台原上沙

寄示諸弟姪詩燈前猶子話家鄉許我丁山結草
堂一夜老懷清似水夢魂先有橘花香

丁山湖

丁山湖在丁山下汪洋百頃遠浮獨山近接超峯舟入其中澹宕可愛昔東坡比西湖為西子余謂丁山湖亦西子也特未入吳宮少金翠之飾耳

翠堂森禪師丁山水居詩二首踏徧三吳兩浙山可來湖上恣幽閒溪菱過雨花初白堤柳經秋

唐樓志略卷上

四

葉盡斑野艇就羣迴北渡斜暉辭我落西灣蟾生隔岸猶堪望逐水柴門夜不關

一湖秋水碧連天風送蘋香到岸邊茆屋矮依丹樹縛道人閒伴白雲眠堤旁乍落經霜葉籬外常

過載月船雖是現成西祖意跨門先在檻機先周天度與吳南礪說丁山湖之勝綴四斷句春波

瑟瑟小橋橫十里沿洄似掌平記得年時輕舸別杏花疎雨近清明

曲水銀塘宛轉通千絲楊柳不垂風結鄰合伴東家住畫閣遙臨一畝宮

漁莊蟹舍自天斜，荷葉菱花處處家。不道有人天漢外，秋來依舊望星槎。

鴉色新盤四起鬢，淡雲籠鬢玉梳彎。怪來曉鏡添眉嫵，學得臨平雨後山。

翠紫湖

翠紫湖在八字橋東，徐野君曰：每當夕陽初下山色，欲沈霞影，烟光紫翠，交集於斯際也。思披鶴警乘蘭舟，采芙蓉，搴芳杜，呼黃鶴，仙人嗚嗚鐵笛，歌竹枝於中，了不知其鄰於塵郭也。

唐樓志略卷上

五

朱大輝翠紫湖詩百頃汪洋翠紫湖，奔流天目此旋鋪。蒹葭人近停雲逸，蓼葦筇翁釣雪無。數葉烟波爭網漢，亂聲淒月夜歌蘇。得魚桑市前津換半飽，新鷺半飽鷓。

橫潭

橫潭以潭橫於市偏也，乃棲鎮山水獻秀之所。景物清曠，看月尤宜。聞是地亭館相望，今惟青蘆披拂，白鷗往來而已。

馮硯祥橫潭歌。橫潭漾漾泛秋月，悵望烟波渺難越。涼風吹動木蘭舟，月明處處菱歌發。菱歌乘月起中流，隱隱簫聲動畫樓。簫聲菱唱音相亞，橫潭

月轉金波瀉，月轉金波泛。濫過夜深搖落秋風多，獨憐天末佳人晚。秋水芙蓉愁奈何。

大明寺井

大明寺井，今無考。白珽謂井上鐫隱語云：一人堂堂兩曜垂光，井深尺一點去冰旁。二人同行不欠一邊，三梁四柱足火然。若有雙鉤兩日全，乃大明寺水下無比八字。

牛潭

牛潭在馬鞍山東麓，水味甘而冽。卓方水馮硯祥偕往汲烹芥茗，以為品在惠泉上。

唐樓志略卷上

六

天然泉

天然泉又名龍井泉，在白栗山泗水菴內石罅間。天然成井，不假發鑿，味香冽，煎茶逾信，宿不敗。

邵銳汲泉煮茶詩。棲溪老人鬢欲華，杖藜方外謁袈裟。雲端度嶺青天近，松下乘風白幘斜。峭壁坐禪飛錫杖，空堂演法雨天花。明年此興遲遲日，重到南山看采茶。

丁養浩步韻詩。絕頂清新遠物華，一塵飛不到袈裟。松高百尺穿雲出，竹壓禪關帶月斜。野鶴有時閒教子，老梅無語自開花。相逢莫問人間事，紗帽

籠頭且喫茶

沈朝煥步韻詩洞古山深閱歲華東林遺事欵袞
裳雲開水鑑層層入烟裊藤枝故故斜暇日羣公
三徑草方春遊客五陵花蘭亭墨妙猶堪讀共愛
泉香陸羽茶

東小河

東小河在鎮東北居人面山臨水長廊曲檻荷柳映
之宛如畫境騷人詞客常放舟鴈詠於此

徐士俊野君詩風裳水佩若為裁東小河邊望眼
開莫道聞歌人不見荷花深處蕩舟來

唐樓志略卷上

七

落瓜堰

落瓜堰在唐樓東北前明諸生徐介字孝先居此俗
稱落瓜徐氏父灝崇禎甲戌進士知武陵縣事甲申
後孝先棄田廬白衣冠徜徉山水間已而入河渚梅
花開時日夕游咏其下喜飲酒善哭侯官高北嘗千
里訪先生留宿寓廬夜半聞大哭問之蓋鼠銜先生
葛巾去也嘗製一艇往來樓上乘之

金介山河渚艇詩似此些些一釣槎祇堪河渚看
梅花曾云偶出人相駭及問何名爾可嘉小子便
呼徐介艇後時直比邵雍車塘樓半萬人家在問

訊停篙只我家

又正月六日喜徐孝先先生來計不過河樓一年
矣詩云春日漸遲遲船來河渚時奇聲先密友樂
道到妻兒不至君何意經年我頗疑苦留過人日
省寄草堂詩

古蹟

龍樓已失空村賸紅粉之魂麟閣虛標寒
月照青苔之骨誰憐寶玦曾佩腰間想見
鐵衣不離身上是足興哀於杜甫兼堪憑
弔於李華志古蹟

唐樓志略卷上

八

伍子宅

伍子宅故址在鎮西相傳子胥避難之所其傍村港
皆名伍林
陸進蓋思詩往事興亡幾代餘土人猶說伍公居
吳宮越苑今何在荒草寒烟古木疎
張超徵詩聞說英雄伍大夫避仇曾宿此中乎越
王自沼吳官後鐵壘金城亦已無

句壘

句壘在鎮北十里為越王句踐屯軍處其北岸名城
頭蓋越王曾築城於此

沈去矜詩野水悠悠落日斜斷刀遺鋤牛沈沙與
亡說盡無人會幾處墩樓噪晚鴉

張祖定詩幾年臣妾向姑蘇甲士三千竟沼吳伯
業可憐隨逝水蕭蕭舊壘叫寒鳥

王莊基

王莊基南宋福王與芮莊院故基也福王居妃妾其
間一時豔冶之盛脂膩漲流今紅粉溝美人塚洗馬
池皆舊蹟也伯顏破臨安福王及宗室駙馬隨恭帝
北行宮人數百俱自盡後是地時聞環珮聲有士子
月夜憑閣聞歌云淡淡春山抹未濃偶然還記舊行
蹤自從一入朱門後便隔人間幾萬重

唐樓志略卷上

九

張超微感賦詩襄樊正報圍城急天子求賢不可
得賈相行邊建閫時富商債帥相凌奪葛嶺高歌
樂未休王公戚邸咸優游臥龍橋畔羣芳聚翠華
晉此度春秋紅粉溝頭高髻娥宮門砢砢如山河
洗馬池邊人卻步黃金布塔錦成窩樊城既失襄
陽去半閒堂空鳥雀踞相國行成駙馬隨謝村載
璽朝京師諸王妃子同囚首雕梁畫棟俱難守池
荒橋斷佃民居大河既開風氣殊人文蔚起翰苑
出甲第連雲難具述佛廬僧舍如蟻封賓客去住

隨鳴鎖吁嗟乎離宮別館荒蕪徧耕夫往往鋤珠
釧錢爐孟劍或有之遺簪斷珥深池現蒼龍壓津
虹影拖攘攘鬧市成肩摩富貴更翻景物換舊日
繁華可奈何

又紅粉溝詩紅粉溝頭窈窕娘蟠龍髻子藉絲裳
傾城一笑千秋恨夢影猶飛蛺蝶廊

曹妃洗馬池詩花園一望暮陰存路入餘橋桃柳
繁洗馬風流誰得似王孫芳草不堪論

六墓

六墓在鎮北村中福王諸妃墓也凡六所因號村曰

唐樓志略卷上

十

六墓

沈去矜詩月底金盞出墓門花開寶曆溼啼痕江
邊不見冬青樹猶憶姍姍帳裏魂

王丹麓詩斷碣殘碑半掩塵寒烟衰草不成春誰
知此地埋香骨盡是當年掌上人

陸蓋思詩村烟漠漠鳥飛還粉黛銷沈荒草間知
爾魂歸明月夜不堪南望鳳凰山

張振孫詩荒村問古弔宮娃落日平原徧野花猶
得芳魂依故國絕勝青冢傍黃沙

花園墳

花園墳葬元處士陳伯通地卽福王花園也伯通字汝明錢塘西溪人福王長史陳仲謀孫幼隨長史於樓上福王北遷園基爲豪富所得不勝感憤乃倍鐵贖歸伯通卒遂瘞於此故稱花園墳云

尤平章宅

尤平章宅在庫橋元平章尤某故宅址也傍有浣金潭相傳平章女浣金盆於此

張之孺詩高門聲勢可如雷富貴還同泡影猜昔日豪華遊樂處斷釵零壁總成灰

呂律詩潭潭甲第此崔巍金積豪門限鐵扉寂歷

唐樓志略卷上

十一

空流橋下水數株垂柳暮鴉飛

乙未亭

亭在丁山湖

張日容大受題徐大臨湖鄉小景詩烏背嵐光過

夕汀碎萍魚唼水花腥青山一角湖三面記是塘

西乙未亭

奉口戰場

奉口戰場在鎮西北二十里三旦八公勦殺元軍於

此場鐵崖作勦德碑文以紀其事

高啟過奉口戰場詩路迴荒山開如出古塞門驚

沙四邊起寒日慘欲昏上有饑鷲聲下有枯蓬根

白骨橫馬前貴賤甯復論不知將軍誰此地昔戰

奔我欲問路人前行盡空村登高望廢壘鬼結愁

雲屯當年十萬師覆沒能幾存應有獨老翁來此

哭子孫年來未休兵強弱事併吞功名竟誰成殺

人遍乾坤愧無拯亂術伫立空傷魂

陳基過奉口詩溪塢晚舍風山營夜依谷棲鳥息

復驚歸雲斷還續畫舸止宵征連艦銜尾宿戍鼓

雜鳴笳秋聲一何肅

塔基

唐樓志略卷上

十二

塔基在鎮東里許嘉靖間胡總制宗憲築今建文昌

閣其上卽俗稱八角亭是也

張綱孫詩棲水合流處其中有孤墩壘石爲基址

上有白骨存渺渺蘆葦烟簇簇蒹葭根幾秋飄雪

花每春長浪痕水鼠拱沙穴野鷺飛黃昏往來多

客舟經過傷心魂昔人知地脈疊此當橋門雖非

豔頰堆亦足壯乾坤

梵刹

象教莫隆於吳越伽藍比盛於洛陽乃有

精廬允稱淨土旣俯清蓮以彌幽兼帶長

林而益勝志梵刹

唐棲寺

唐棲寺今無考

釋永頤詩唐棲寺前溪水流客帆來往舊杭州津亭樹老無人記得見幾回僧白頭

又葺唐棲舊廬詩矯時無峻節立行虧眾美遠岳憚孤征徘徊就鄉里人情好愉悅我老齊賢鄙媿媿聽鄉言時時容側耳前修不可見法社漸凋毀名山半征徭祖塔亂獐麋林築無清資澤居循舊址盤牖納晴曦蒔竹臨幽泚時將了歲寒閉戶春

唐棲志略卷上

三

風裏

大善寺

大善寺在鎮西北額為趙孟頫書字大徑尺結體古茂蓋真蹟也其後禪寮有古樹合抱蔭蓋畝許王伯穀為篆額曰獨樹齋今仍其名書則易為八分矣無名款字亦疎瘦可愛不知何人書也殿前又有無心柏一株高五丈七尺傳是石晉時物乾隆十六年南屏詩僧讓山來主方丈

李日華秋晚過大善寺詩塘南樓閣萬家稠塘北招提少客遊剩有殘僧閒補衲夕陽紅樹一房秋

田藝衡晚登大善寺寄呂時行詩高樓獨上雪初晴平楚風寒鐘自鳴傍水人家開野寺並舟婦女向江城一枝北去憐梅蕊八字南來聽雁聲賦就長楊知已獻五侯誰不重君卿

又新春雪中期呂時行不至詩舊得塘西一紙書西遊約在早春初停雲幾廢良朋咏掃雪難迎長者車老竹嶺頭關不鎖下浮溪口市成虛知君已展扶搖翼惟有梅花伴索居

杭太史堇浦訪大善寺讓山僧詩古寺團團塔繙經草滿階問年頭似許對客眼初揩佛座供銅盃

唐棲志略卷上

四

香厨挂筍鞋日長喧鳥雀得共飽清齋

翟灝詩苔荒石礎剝遺塵古柏猶傳不壞身落日

嘯風兼嘯雨替他龍象泣天人

春去林梢薄靄分一重波外翠氤氳閒心共佛跏

趺坐盡日門開向白雲

釋大香獨樹齋詩千秋禪寂樹清影護雙扉當時

曾一宿花墮水田衣

又詠無心柏詩指示婆娑樹曾參造化禪至今空

五內獨立小庭前

清流寺

清流寺在鎮東北軒豁宏敞殿後千佛閣高聳百尺
舟船往來見於里許之外聞閣後舊有石刻貫休六
祖李龍眠羅漢唐子畏魁星諸像皆卓光祿明卿家
藏眞蹟雙鉤勒石者今俱不存寺亦寥落矣

董道權登千佛閣詩上盡層梯倚曲闌諸峯青似
碧琅玕枝撐直欲侵霄漢魚鼓微聞自戒壇野色
四時堪作供天風五月尙生寒登臨到處懷親舍
指點江東放眼看

張綱孫和王百穀清流寺詩古寺當樓口登橋一
片霞連橋知水市俯岸見人家細火沿坡落遙山

唐樓志略卷上

五

八樹斜此時圓月上處處映秋沙

棲霞院

棲霞院在鎮北址爲里人朱氏捨俗呼草菴順治中
天童僧石菴駐錫於此改今名門徑幽僻春風秋月
彌多佳致中有且挂瓢樹下居諸勝東海范文白驥
有徑窄能容竹池寬可養鵝之句

新安趙吉士甲寅除夕父子會於棲霞禪院詩何
期離亂後此地獲團圓不惜三冬盡徒傷舊歷殘
寒鐘開靜梵野火爆叢竿相對渾如夢猶疑故里
看

結成方外契烟水隔籬門遠棹來猶子分攜及稚
孫桃弧驅疫鬼酒脯祭詩魂半載傷心處艱難忍
細論

未遂幽棲意禪關偶一探柴門懸棘矢陌路照田
蠶大父依方丈諸孫傍佛龕竹林惠遠在清夢結
雲曇

忽忽年老去兵戈剩此生離鄉剛兩月分歲正三
更暫爾伊蒲供歡然菽水情故園邱壑好歸隱未
寒盟

又乙卯元日詩四首夜半春旛動烟光萬戶齊

唐樓志略卷上

六

鄰新洛舍寄跡古塘棲大地皆燃草荒村亦磔雞
辛盤羣獻祝豈必別東西

相攜支許伴羅拜梵王家霜竹長含翠寒梅半著
花江南哀井里直北憶京華座客皆名士何須覓
孟嘉

始覺征鼙靜僧扉不復扁救焚誰喚酒奪席爾談
經故國藏豺虎寒原駐鵲鴿塵襟滌欲盡竹影舞
空庭

繞膝羣兒在長文方弱年深杯傾白墮舊物失青
甕天臘初開後春光欲曉前午餘花雪降古渡起

新烟

淨土菴

淨土菴在花園墳西額為董文敏公書村徑紆折遊
屐鮮至

資慶院

資慶院俗稱西茶亭距長橋里許明東礪老人記黃
汝亭篆額

綠野菴

綠野菴在鎮南山桑徑度橋而入橋外蒼山遠橫平
蕪彌望綠野之名不虛也

唐樓志略卷上

七

紀伯紫過綠野菴詩終歲塵務牽茲辰遂清賞閒
來十笏居輕攜九節杖短垣綦薜蘿平橋帶林莽
帆移古塘外月照遠山上幽景人不知天公付吾
黨

南屏豁堂和尚詩小岸臨流可滌煩幽棲初不礙
居村山橫平楚浮檻野度低橋綠到門雙燕來
稀人喜靜一牛鳴遠市忘喧若教種樹能遮屋絕
勝鋪金貴買園

浮梁院

浮梁院在鎮東北極盡處院三楹不柱而梁承以土

垣如浮焉故名舊為呂氏德勳書院趙文華為諸生

時館於呂其額猶文華書頗端勁有法不類其為人
郭西章詩皋鶴當軒入畫圖夜深鐘鼓醒吾徒空
林漠漠寒烟外古墓荒田有鷓鴣

永清寺

永清寺在三分村寺門臨水古樹扶疎清潭演漾亦
一幽棲薈薈林也

丁養浩詩向晚入蕭寺松蘿暗水濱樹頭鴉噪久
門外客來頻老鶴翻空翠歸鴻背夕曛巢由空洗
耳終此避囂塵

唐樓志略卷上

六

慧日寺

慧日寺在博陸村壁間有倭字詩人不能識
丁養浩追憶舊遊詩博溪溪上一追遊慧日名山
萬古秋三徑草堂通別墅一間茅屋瞰清流月明
村塢僧歸晚雲掩松關鶴夢幽尊酒醉來成一笑
高風絕勝虎溪頭

德雲菴

德雲菴在界河村即趙松雪與中峯禪師倡和梅花
詩處壁有松雪墨梅一株今毀

朱大輝詩行過溪邊草綠吹來竹裏香清不見王

孫墨妙空堂獨立含情

一片桑陰未葉幾株杏瓣初花前峯濃淡雲氣半繞蕭瑟僧家

化城菴

化城菴在馬鞍山趙松雪題額曰化城深處又井關石刻淳祐年號亦松雪篆書俱不存

報福寺

報福寺在超山之麓寺門幽邃遊者繞梅以入後殿有石刻吳道子觀音像寺僧飾以金粉失古舊之色矣

唐樓志略卷上

九

泗水菴

泗水菴在白栗山之陽背負小阜連岡突石可眺可遊接阜以往中斷為峽林木幽蔚人寂境清最為勝處而遊山者未之知也

水南廟

水南廟在鎮南神為福王妃姓詹氏名玉珍泉州人福王北行藩邸妃妾多從之者神獨悲憤不食誓以身殉飲鴆不死遂死於井年二十七里人感其忠節立廟祀之至今勿衰

吳世昌水南廟行宮落成詩卓然女節邁男兒殉

國從容死不辭偏闕芳名傳信史好憑神社當忠祠數椽增築重題額四壁新塗並紀詩南渡河山都莫問尚畱尺土祀金枝

唐樓志略卷上終

唐樓志略卷上

十

何琪東甫輯

園圃

居人爲指遺蹤石荒甲乙過客空尋舊跡
檻失庚辛拙筆記成愧比當年李文叔哀
絃撫罷笑同昔日雍門周志園圃

呂園

呂園在鎮北呂都事北野與弟鴻臚寺丞水山別墅
也積石累山規模宏敞其藏書之所曰樾館王伯穀
篆額曰喜聲館陳眉公書額曰綿慶樓文衡山書額

唐樓志略卷下

曰一本堂周天球書額北野子似野官光祿肖野官
太僕當時賓客之盛第宅之侈甲於杭郡今蕩然無
存後嗣能讀遺書者亦寥落矣昔張芸叟過魏文貞
公莊居有句云兒童不識字耕稼鄭公莊盛衰之理
古今一致可慨也

文徵明贈呂似野詩而翁北野擅聲華令子才情
亦稱家代屬還分黃犢草釣緡時拂白鷗沙天連
平楚孤雲渺秋滿寒泉落照斜目斷長空心共遠
此生歸宿豈無涯

王穀祥贈肖野詩浙中今古多才彥喜見名家有

後人溫潤襟懷同白玉清修眉宇照青春從知東
箭書稱美始信南鏐世所珍何以贈君何以處仁
看鷗鷺試秋旻

周天球偕諸友元夜飲綿慶樓詩川途渺渺涉風
湍落晚停橈問呂安遠興正逢春後雪故人聊贈
澤中蘭燒燈水市星俱爛買酒林塘夜已闌形外
論交誰古道囊琴欲發爲君彈

丁氏別業

丁氏別業丁方伯養浩所築在漳溪有景薇堂前後
樹石位置皆文衡山仇十洲兩家經營也其西軒顏
曰夕佳蓋養浩謝政歸里取娛晚景之意子之喬工
詩好客吳中謝時臣沈青門周東村皆往來倡和於
此蓋名流聚會之所也

卓園

卓園在鎮南芳杜洲爲卓光祿明卿別墅園中爲介
如堂東爲夕陽明半樓西爲月波樓面舉亭黃鶴諸
峯樓側爲靈籟館爲白雲堂

文徵明過卓明卿園居詩卜築幽棲一畝宮冷然
時欲御天風月光縹緲開簾處山色虛無覽鏡中
靜對晴波沙鳥白亂翻春浪野桃紅知君應是龍

門客未許扁舟作釣翁

袁尊尼詩碧水環洲杜若香切雲重屋隱雕梁美人日晏披瑤笈幽客時來釣玉璜圍合松蘿三徑杳交加竹樹四山蒼何年雀舫樓邊繫皓月澄波對舉觴

周天球詩聞道中洲勝春生杜若香盈盈只一水渺渺卽三湘鳴榔吳歛近攀芳楚調長美人時在望欲往恨無梁

東園

東園亦卓光祿園也中構樓曰大空曰梅花軒曰茶

唐樓志略卷下

三

癖堂曰衆白其堂顏壁畫並董思翁手筆左右花木交蔭闌楯周接無不妍巧若夫水光鏡展山色黛橫斯又樓中之勝矣後驚於隣人吳氏其孫回祗徊不忍去乃作詩畱別云可憐落落一長松倒挂離愁千萬重卷石行吟聊小坐長廊散步泣悲風無錢賣竹慚蘇軾有志攜琴憶蔡邕惟爾滿園秋色他時惜我片時容

沈洪芳和卓回別東園詩臨溪曲曲有長松秋未逢霜楓未紅佳景乍來人漸去愁心欲遣話偏重枯藤似擬牽離袂頑石還多惜別容更語堂前三

桂子堂中不是浣花翁

卓人月讀方水弟別東園詩賦詩慰之二首且休問此徑誰開萬古誰非過客哉吾不必將吾室愛後當復有後人哀賀云之子隨鳩入笑曰狂夫愧燕回今日便如閒借看長鬚爲我洗厄來

忽乎吾欲遠行兮賣此相如四壁泥豈若馬難忘此豆安能雞共鬪於醯碩人之軸非余軸君子攸躋聽爾躋花落鶯啼都不見蘇公送客過塘西子瞻送毛澤民句云明朝歸路下塘西不見鶯啼花落處

竹里館

唐樓志略卷下

四

竹里館在鎮東界河村以其構於竹中而名之也竹之外有榭焉因架閣曰榭閣卓光祿之子爾康著述地也爾康官屯田以抗直罷歸晚年空囊壁立日僅麥糜一盂友人爲之募飯作啟

東礪老人過樓水訪卓爾康於榭閣詩一官落魄賦歸來華髮蕭騷樓水隈陶令門前惟綠柳江淹宅畔只青苔三間老屋談經處兩板荆扉避債臺贏得他時青史在儒林廉吏並崔巍陳繼儒過竹里館詩有個閒人閒更閒焚香日日掩松關萬株老樹千竿竹遮斷溪南枕上山